



Inatsisartunut qinersisarneq pillugu inatsit allanngortikkusunneraat, nunatsinni najugaqarsimanissamik piomasaaqatip sivitsorneqarsinnaanera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Doris J. Jensen, Siumut)

Inatsisartunut ilaasortamut Doris J. Jensen-imut qujanaq siunnersuummut.

Demokraatit isumaqarput, tamat oqartussaaqataanerat innuttaasunut tamanut atuutissasoq nagguik apeqqutaatinnagu. Tassanilu aamma qinersisinnaatitaanermut.

Ullumikkut imaappoq, maani nunatsinni Inatsisartunut qinersinermut qinersisinnaanngortarlutik, qaammatit arfinillit maani najugaqarsimagunik. Isumaqarpugut, taakku qaammatit arfinillit naleqquttut, piffissaq taanna atorlugu politikikkut ingerlatsinermut paasisaqartoqarsinnaammat paasillugulu, partiit assigiinngitsut qanoq isumaqarlutillu anguniagaqarnersut. Pingaarnertut aamma eqqaaneqassaaq nunatsinni najugaqarniarlutik aaliangersimasut soorunami aamma sunniuteqaqataasinnaanissaat qulakkeerneqartariaqarmat.

Taamatutaaq isumaqarpugut, tulluurtuusoq, innuttaasutut politikkerinik partiinillu qinerseqataanissaq, aningaasanik paarsisussanik, nunatta karsianut akilertakkatsinnik.

Nunatsinni najugaqarsimanissamik piomasaaqatip sivittorneranut ajornartorsiutaasussaaq aamma unaavoq, innuttaasoqatitsinnut toriaannaanera. Inuk, Kalaallit Nunaanni inunngorlunilu peroriartorsimasooq ukiuni arlaqartuni nunani allani najugaqarnissaminik toqqaasimasooq, taava taanna inuk nunatsinni najugaqarsimanissamik piomasaaqammik aamma eqqorneqassaaq, pineqartoq angerlaqqinnissani toqqaruniuk. Annertuumik ajornartorsiutaareerpoq kalaallit nunani allaniittut angerlarlutik nuutsinnissaat tapersiinissaallu – angerlarnissaq pilerinarnerunaviangilaq, nunatsinni najugaqarsimanissamik piomasaaqat sivittoraluarutsigu imaasillugu, kalaallit, angerlaqqittut, piffissarujussuarmi Inatsisartunut qinersinissaminut qinersisinnaatitaanissaminut utaqqisillugit.

Tassalu Demokraatit oqallinnermut oqariartuutaat.